



## АҚПАРАТТЫҚ ХАБАР

2019 жылғы 14 қаңтар

### **Қазақстан Ұлттық Банкі базалық мөлшерлемені 9,25% деңгейде сақтау туралы шешім қабылдады**

Бүгін 14 қаңтарда Ұлттық Банк базалық мөлшерлемені +/-1 пайыздық мөлшерлемелердің дәлізімен 9,25% деңгейде сақтау туралы шешім қабылдады. Өтімділікті ұсыну және алу операциялары бойынша мөлшерлемелер, тиісінше 10,25% және 8,25% деңгейде өзгеріссіз қалдырылды. Бұл туралы Қазақстан Ұлттық Банкінің Төрағасы Данияр Ақышев телевизиялық БАҚ үшін брифинг барысында айтып берді.

Ол ресми қайта қаржыландыру мөлшерлемесінің 9,25% деңгейде қалғандығын атап өтті. «Ағымдағы шешім кезінде жылдық инфляцияның нақты деңгейі, оның ағымдағы жылғы болжамдық мәндеріне және бағаларына сәйкестігі, сондай-ақ халықтың инфляциялық күтулерінің байқалып отырған төмендеуі назарға алынды», - деп түсініктеме берді Д. Ақышев.

Ол жылдық инфляцияның нысаналы дәлізге сәйкес деңгейде қалыптасатындығын қоса атап өтті. Оның айтуынша, базалық мөлшерлеменің ағымдағы деңгейі едәуір күйзелістер болмағанда 2019 жылдың соңында 4-6% жаңа дәліздің ішінде инфляцияның қалыптасуын қамтамасыз ететін болады.

«Бұл ретте Қазақстан Ұлттық Банкі әлемдік нарықтардағы, атап айтқанда мұнайдың әлемдік нарығындағы үрдістерді, сондай-ақ басқа елдердің орталық банктеріндегі өздерінің мөлшерлемелерінің деңгейі бойынша шешімдерін мұқият қадағалайды», - деді Д. Ақышев.

Қазақстан Ұлттық Банкінің басшысы инфляцияны нысаналы дәліздің шегінен тыс жібермеудің алдын алу Ұлттық Банктің міндеті болып табылатындықтан сыртқы сектор тарапынан тәуекелдерді бағалаудың басым екендігін атап өтті. «Негізгі шикізат нарықтарында нақты құбылмалылықтың ішкі макроэкономикалық көрсеткіштерге және қаржы секторының көрсеткіштеріне ықпалы күшейген кезде ақша-кредит саясатын қатаңдату туралы шешім базалық мөлшерлеменің деңгейін кейіннен қарау кезінде қабылдануы мүмкін», - деді Д. Ақышев.

Базалық мөлшерлеме бойынша кезекті шешім 2019 жылғы 4 наурызда Астана уақытымен сағат 17:00-де жарияланады.

### **Данияр Ақышев базалық мөлшерлемені 9,25% деңгейде сақтау шешіміне ықпал еткен факторлар туралы айтып берді**

2018 жылдың қорытындысы бойынша инфляция, Қазақстан Ұлттық Банкі күткендей 5-7% нысаналы дәліз шегінде сақталды. Өткен жылғы соңғы үш айда инфляция 5,3% деңгейде болып, өзгерген жоқ. Бұл туралы Қазақстан Ұлттық Банкінің Төрағасы Данияр Ақышев телевизиялық БАҚ үшін брифинг барысында айтып берді.

Ол 2017 жылмен салыстырғанда инфляцияның бәсеңдеуі тұтынушылық тауарлар мен қызмет көрсетулердің барлық тобы бойынша тіркелгенін атап өтті. Азық-түлік

тауарлары бойынша бағаның өсуі бір жыл бұрынғы 6,5%-бен салыстырғанда 5,1%-ды, азық-түлікке жатпайтын құрауыш бойынша 8,9%-бен салыстырғанда 6,4%-ды құрады. Ақылы қызметтер 4,5%-ға қымбаттады, ал 2017 жылы тарифтердің өсуі 5,9%-ды құрады.

Д. Ақышевтың айтуы бойынша, халықтың инфляциялық күтулері желтоқсанның қорытындысы бойынша 5,0%-ды құрай отырып, нақты инфляцияның деңгейінен төмен болып қалыптасты. 4-тоқсанда олардың деңгейі іс жүзінде 6,4%-дан 1,5%-ға төмендеді. Одан әрі тұрақтандыру және инфляциялық күтулерге әсер ету тиімділігін арттыру Ұлттық Банктің маңызды міндеті болып қалады.

«Базалық инфляцияның серпіні тұтынушылық нарықтағы инфляциялық аяның сақталуын растайды. Оның неғұрлым құбылмалы бағаларды және реттелетін құрауыштарды қоспай есептелген деңгейі 2018 жылы 6,2%-дан 6,7%-ға дейін жеделдегенін көрсетті», – деп түсіндірді Д. Ақышев.

Оның айтуы бойынша негізгі фактор ішкі сұраныстың кеңеюі болып қалуын жалғастыруда, ол өткен және сол сияқты ағымдағы жылы басым түрде фискалдық ынталандырумен нығаяды.

«Мәселен, халықтың нақты кірістерінің өсуі 2018 жылғы 11 айда 4,4%-ды құрады. Ішкі сұраныстың кеңеюіне 2019 жылы жалақысы төмен қызметкерлер үшін ең төменгі жалақының көтерілуі және салықтық жүктемесін төмендеуі себепші болады», - деді Қазақстан Ұлттық Банкінің басшысы.

Ол сондай-ақ тұтынушылық кредиттеу көлемінің өсуі қарашада жылдық көрсеткіш бойынша 11%-ды құрады. Экономиканы кредиттеудің одан әрі өсуіне 20147-23018 жылдары жүргізілген банк секторын қалыпқа келтіру және реттеу мен қадағалаудың жаңа тәсілдері себепші болады. 2019 жылы кредиттік портфельдің номиналдық ІЖӨ өсуіне жоғары қарқынмен өсетіні күтіледі.

Сыртқы секторда Д. Ақышевтың айтуы бойынша, қысқа мерзімді және сол сияқты орта мерзімді перспективада тәуекел сценарийлерін іске асыру үшін айтарлық әлеует бұрынғыша сақталады. «Мұнайдың бағасы алдыңғы жылғы қазан-желтоқсанда соңғы бір жарым жылдағы ең төменгі мәндерге дейін төмендегеннен кейін, өткен аптаның соңында бір баррель үшін 60 АҚШ долларынан жоғары деңгейге көтерілді. Сонымен қатар, олар 2018 жылғы қазанның көрсеткіштерінен айтарлық төмен болып қалады», – деп қорытындылады Қазақстан Ұлттық Банкінің басшысы. Ол осындай құбылмалылықтың одан кейінгі перспективада әлемдік нарықтардағы жоғары белгісіздікті құрайды деп толықтырды.

«Сонымен қатар сыртқы инфляциялық аяның күшеюі байқалады. Негізгі сауда әріптес ретінде Ресейдегі нақты жылдық инфляция 4% болатын нысаналы көрсеткіштен жоғары қалыптасуда. Ресейден импорттың жоғары үлесін ескере отырып, ағымдағы жылы Ресей инфляциясының бұдан әрі жылдамдатылуын бағалау Қазақстанның ішкі бағаларына проинфляциялық қысым үшін әлеуетті қалыптастырады», - деп айтып берді Д. Ақышев.

Ол әлемдік тауар нарықтарында бағалардың жалпы төмендеуінің байқалып отырғандығын атап өтті. ФАО индексі жылдық көрсеткіште 4,3%-ға төмендеді. Желтоқсанда сүт өнімдері мен қант бағасын белгілеудің төмендеуі тіркелді. Осыған қарамастан, дәнді дақылдардың, ет пен майдың бағасы өсті.

«Жоғарыда аталған факторларды ескере отырып, ағымдағы жылы Қазақстан Ұлттық Банкі инфляцияның жаңа, неғұрлым төмен 4-6% дәліз ішінде сақталуын күтеді. Бұл ретте, ағымдағы бағалаулар, оның деңгейінің жылдық соңында 5-6% шегінде дәліздің жоғары бөлігінде қалыптасатындығын көрсетеді», - деп түйіндеді Қазақстан Ұлттық Банкінің басшысы.

## **Данияр Ақышев қаржы нарығының көрсеткіштері туралы айтып берді**

2018 жылдың соңында Қазақстан Ұлттық Банкінің алтынвалюта резервтері, алдын ала деректер бойынша 30,9 млрд АҚШ долларын құрады. Елдің халықаралық резервтері 88,6 млрд АҚШ долларына жетті. Бұл туралы Қазақстан Ұлттық Банкінің Төрағасы Данияр Ақышев телевизиялық БАҚ үшін брифинг барысында айтып берді.

Ол ақша нарығында басым түрде ноттарды шығарумен алынатын артық өтімділіктің сақталып отырғандығын атап өтті. «11 қаңтардағы жағдай бойынша Қазақстан Ұлттық Банкінің өтімділікті таза алуы 3,1 трлн теңге болды. Айналыстағы қысқа мерзімді ноттардың көлемі 3,6 трлн теңгені құрады. Желтоқсанда, ноттар бойынша кірістілік, мерзімділігіне қарай 8,77%-8,91% ауқымында қалыптасты», - деп айтып берді Д. Ақышев.

Оның айтуынша, ағымдағы жылдың 11 айы ішінде депозиттер 17,8 трлн теңгеге дейін 1,7%-ға өсті. Ұлттық валютамен депозиттер 1,6%-ға төмендеді. Шетел валютасындағы депозиттер 5,4%-ға өсті. Нәтижесінде, депозиттерді долларландыру қарашаның соңында 49,4%-ды құрады.

«Кредиттеу нарығы қалпына келуде. Ағымдағы жылғы 11 айдың ішінде жаңа кредиттер беру 24,9%-ға немесе 2,4 трлн. теңгеге өсті. Қайта құрылымдалып жатқан және лицензиядан айырылған банктердің кредиттік портфелін есептемегенде, экономиканы кредиттеудің жылдық өсуі 8,1%-ға немесе 942,7 млрд. теңгеге бағаланады», - деп түсініктеме берді Д. Ақышев.

Қазақстан Ұлттық Банкінің Төрағасы атап өткендей, кәсіпорындарға теңгемен кредиттер бойынша мөлшерлеме жыл басындағы 13,2%-дан 2018 жылғы қарашада 12,5%-ға дейін төмендеді.

«Ағымдағы ақша-кредит талаптарын біз бейтарап деңгейге жақын деп бағалап отырмыз. Бұл жүргізіліп отырған ақша-кредит саясаты, біріншіден, 1 жылдың шамасында инфляция бойынша мақсаттарға қол жеткізуді қамтамасыз етеді, екіншіден, экономикалық өсу қарқындарын оның әлеуетті мәндерінде қалыптастыруға кедергі жасамайды», - деді Д.Ақышев.

Ол, базалық мөлшерлеме бойынша бұдан былайғы шешімдердің негізгі өлшемшарттарының бірі қазіргі сатыда 2020 жылдың соңына 4%-дық инфляция бойынша мақсаттарға қол жеткізу қажеттілігі болып отырғанын қоса айтты. «Ішкі қаржы нарығында тұрақтылықты төмендететін әлемдік мұнай нарығының ағымдағы құбылмалылығы сақталған жағдайда ақша-кредит саясатын қатаңдату туралы шешім базалық мөлшерлеменің деңгейін келесі қарау кезінде қабылдануы мүмкін», - деді сөзін қорыта келе Д.Ақышев.

Неғұрлым толық ақпаратты БАҚ өкілдері мына телефон бойынша алуына болады:

+7 (727) 704 585

e-mail: [press@nationalbank.kz](mailto:press@nationalbank.kz)

[www.nationalbank.kz](http://www.nationalbank.kz)